

Il gisoit de nuit a terre et nauoit aultre lit sinon seulement vng peu de feurre ou une cloye faite de grosse verges et vne coute pointe noire vile, orde et vsee, de laquelle il se cououroit quant il faisoit grant froit. Deuant la celebracion de sa messe, auant quil vestesist les vestemens de prestre, le chief enclin, la face couuerte de son chaperon, ses mains jointes en grans souspirs et gemissemens semettoit a genoulx en oraison deuant ou de coste lautel ouquel il deuoit celebrer, et sa messe acomplie il faisoit de rechief samblablement. En celebrant sa messe souuentefois lui decouroient larmes plantureusement, duquel lumilite en montant au saint autel pleut moult bien a la maieste diuine si comme dieu le demonstra en lesglise de Triguier, car vne coulombe de merueilleuse resplendeur fu veue manifestement voler du lieu ouquel saint Yue estoit jusques au grant autel de la ditte eglise en donnant admirable lumiere qui resplendissoit tout a lenuiron la dicte eglise de tres grant clarte.

Il fut plain de tres grant pacience en choses diuerses et aduerses en soustenant reproches car quant les hommes le souloient moquier pour ce quil viuoit si petitement et pour la vilte de sa vesture. Et si le lesdengoient en le appelant coquin il ne respondoit riens. Mais lui esleuant la pensee a Dieu les soustenoit paciaument et a chiere lie. Il estoit homme de grant tranquillite, tres debonnaire et appaisie en son courage ne oncques ne fu meu a murmure, indignacion ou a yre ne pour quelconques injure que on lui deist ou feist, il ne disoit parole nulle desordonnee. Il amoit et estoit curieux des drois de leglise et des libertez des eglises et deffenseur non paoureux comme bien apparut, car il aduint vne fois que vng sergant du Roy prist et emena avec lui le cheual de leuesque de Triguier pour loccasion du centiesme et du chinquantiesme des biens du deuant dit euesque pour laquelle cause le benoit saint Yue lors estant official osta ledit cheual vertueusement audit sergant et le remena a lostel de leuesque et jasoit ce que on doubta lors ou cuidast que grant mal ou damage deust pour ce aduenir, tant audit saint comme a la dicte eglise comme celui sergant ce procuroit. Toutesfoies pour ce depuis nul dommage ne fu fait au dit saint ne a la dicte eglise. Laquelle chose fu reputee pour miracle de ceulx du pays et non pas sans cause et ainsi celui miracle est attribue aux merites dudit saint.

Il est creu et afferme pour vray estre chaste en chair et en pensee tout le temps de sa vie et si estoit aussi chaste en parole et en regart. Il vesqui tous jours si honnestement et si chastement que oncques nulz signes aultres que de chastete ne furent en lui apperceus ains abhominioit et mauldisoit tous jours et reputoit le pechie de luxure tres grant, et acoustumeement preschant contre icelui pechie retraioit plusieurs personnes de ces ordures et les ramenoit a vie pure et nette.

Il ne fu oncques trouue oyseulx mais tous jours ententif a oroison ou predication ou a lestude des diuines escriptures et acoustume aux oeuvres de charite et de pitie tous jours se occupoit en bien selon la doctrine de lapostre. Il se offroit a dieu en toutes choses prouuables et sans nulle confusion de ses oeuvres traitant adroit la parole de verite eschieuant tous jours tout vain parler et si parloit peu sinon paroles de Dieu et de salut pardurable et en preschant tres bel la parole de Dieu il amenoit les oyans a compunction de cœur et en oultre jusques aux larmes et soy excercitant en ceste sainte oeuvre par tout la ou il pouoit sans lasser en la presence des euesques et des dyocesains, alant tous jours aprie preschoit aulcune fois en .I. jour en quatre eglises moult loingtaines lune de lautre et adfin quil ne